

Ai Carimentran

Le soi de Carimentran, in bouebe de Môtie se bragué, â cabaret, de n'aivoi pavou de ren. « Te monterôs bin tot de pai toi djunque en nôte læudge di Raimieux » que yi demaindé un de ses caimerâdes, « et peus te nôs raippoétcherôs bin le pota de nôte Raimelle? – Lai belle aiffaire! – Et bin, se te rés ci devaint lai pitiatte di djoué, i te baille nôte Falatte »...

Le bouebe boyét encoé in tchâvé de vin et peus tiuâché lai boenne neût en tus ces qu'êtint â cabaret. En rallaint chus le pont de dainse, les baîchates aivint trétus les laîgres és œîls. « Nôs ne le vœulans pus revouere », qu'elles diennent en yôs dainsous, et è y en é aivu pus d'enne que proyaît in Âvé po lu, en dainsaint.

Le bouebe allé raïppelê sai véye taintin, que demoérait en l'âtre bout di velaidge po yi demaindê consoille (c'était enne boenne consoillouse). Elle feut bin ébâbi, po aïcmencie, qu'en lai venieuche révoillie aïprés les heures. Elle yi allé tot de meînme

œuvie lai pouetche de lai tieûjenne et peus le fesét ai entré à poille. Tiaind çât què yi é aivu échpliqué son aiffaire, elle yi péssé les doux éciaivins à cô et peus yi baillé enne botoillatte d'à-benète.

Ïn pô aivaint d'arrivé dains lai Combe és Reveniaints, devés-dedôs de yôte læudge, è boyét enne gouguenèe d'ève de celiejes, po se baillie di couéraidge. Tiaind quèl aïrrivé dains lai Combe és Reveniaints, èl allé tchoire chus enne pochession d'aïmes en poïmne. « Qu'ât-ce vôs faites ci »? què yôs diét. « Poèche nôs aivins dainsie, de nôte vétiaint, le soi de Carimentran, è nôs fât reveni ci, tos les ans, en pochession, lai neût de Carimentran, di derrie côp de lai mieneût à premie tchaint di pou. Aïprés, è nôs fât rallè, devaint lai pitiatte di djoué, sœuffie dains les ciames di Purgâtoire... Vïns d'aivô nos », que yi raïlint tus les aïmes en poïmne, en le tiudaint tirie pai sai blaûde. Cman què rêteniaît, què dérAIMAÎT, les reveniaints raïllement: « Fotons-le aivâ les roïtches »! Mains è y en é enne que yôs diét: « Nôs ne yi pouéyans ren, è poétche de l'à-benète et peus les dous éciaivins, un devaint et peus ün derrie »! È se nèn pouéyéT défaire qu'en feriaint des côps de mainçat de rieme pai dains le moncé.

E reboyét encoé doues trâs gouguenèes et peus è veniét à côp de monté lai Combe és Reveniaints. Tiaind çât quèl à aivu devaint yôte læudge di Raimieux, è feut bïn ébâbi de vouere de lai ciérance dedains. El œûvrét bâlement lai lâdate po pouéyé beuïllie dains lai læudge. Ailaïrme, Due! In dyïndyiaïre était sieté chus l'enrœutchou et raïssaît cman ïn bon diaïle d'aivô son aïchon de crïns. Tos les hannes et peus les fannes, qu'êtïnt moues dâs sept ans dains le velaidge, dainsïnt et peus tchaintïnt ïn vouéyeri. Mains, ât-ce que çoli ne vôs poétche pe dget, voili que lai Raimelle boussé lai pouetche devaint lé et peus entré dains lai læudge. Voili que les reveniaints yi sâtennent dechus, l'aïssannement, yi botennent le couté à cô, yevennent lai pé, décopennent lai bête et peus tchaimpenent les mouéchés dains ïn tchâdiron pendu à crâmeïlle. Tiaind qu'ès sont aivu tieûts, les aïmes en poïmne se les sont paitaidgies po le ressegon. En en semonjon un à bouebe que se breûlé tot lai gouerdge en le tiudaint maindgie. Ès tchaimpïnt les oches à fur et ai meûjure chus les laïves de lai læudge. Tiaind qu'ès sont tus aivu en moncé, les reveniaints raïllement tus ensoïmne: « Raimelle, yeuve-te et peus vais raindgie dôs le graind l'êûjerâle »! Elle se yevé, cman s'è n'y aivaît ren aivu et s'èn allé aïche belle gonsye qu'en veniaint. Le bouebe yi sâté désaïccrœutchie son pota et peus sâté aivâ lai côte. El airait faïllu ôyi le pota soenné à fue, dâs l'enson di Raimieux ai Môtie. Les dainssous l'oyennent et râtennent de dainsie. « Sâvès-vos vite en l'ôtâ », que yôs crié le bouebe, en entraint dains le cabaret, « qu'ï aïs vu les aïmes en poïmne de tos les grôsses dgens que sont mouetches, dâs sept ans, et peus qu'aïvïnt, une fois vou l'âtre, dainsie le soi de Carimentran ». Et peus è tchaimpé le pota emmé le poille.

Le bouebe aivaît diaingnie lai Falatte mains, le lendemain le maitïn, yôs dgens lai trovennent creuvée en l'étâle. Cman que yôte bouebe ne déschendaît pe po le dédjunon ès l'allennent trové moue dains son yét.